



KEMENTERIAN EKONOMI
JABATAN PERANGKAAAN MALAYSIA

KENYATAAN MEDIA

LAPORAN SURVEI MIGRASI, MALAYSIA, 2022

Survei Migrasi 2022 merekodkan 47.3 peratus bermigrasi kerana mengikut keluarga

PUTRAJAYA, 17 OGOS 2023 – Jabatan Perangkaan Malaysia (DOSM) telah mengeluarkan statistik **Laporan Survei Migrasi, Malaysia, 2022** hari ini. Laporan ini memaparkan statistik migrasi penduduk yang berkaitan dengan kadar migrasi, migrasi dalaman dan antarabangsa. Survei Migrasi 2022 telah dijalankan pada 2022 bagi tempoh rujukan 2021 hingga 2022. Laporan ini menyediakan statistik mengenai migrasi di peringkat negeri mengikut ciri demografi dan sosioekonomi termasuk jantina, kumpulan umur, kumpulan etnik, taraf perkahwinan, pencapaian pendidikan, strata, pekerjaan dan industri. Migran di dalam laporan ini merujuk kepada mereka yang mempunyai tempat kediaman biasa yang berbeza pada dua titik masa dalam tempoh satu tahun. Migran tidak termasuk mereka yang berpindah dalam kawasan yang sama.

Ketua Perangkawan Malaysia, Dato' Sri Dr. Mohd Uzir Mahidin berkata, "Kadar migrasi menurun kepada 0.5 peratus pada 2022 berbanding 1.5 peratus pada 2020. Pelaksanaan Perintah Kawalan Pergerakan bagi membendung penularan wabak COVID-19 sehingga separuh pertama tahun 2021 telah mempengaruhi penurunan kadar migrasi dan jumlah migran kepada 158.8 ribu orang pada 2022 daripada 484.1 ribu orang pada 2020. Sementara itu,

komposisi migrasi dalam negeri meningkat kepada 62.3 peratus pada 2022 berbanding 58.4 peratus pada 2020. Sebaliknya, migrasi antara negeri menurun kepada 30.3 peratus (2020: 31.2%) dan migrasi antarabangsa jatuh kepada 7.4 peratus (2020: 10.4%).”

Mengulas lanjut, Ketua Perangkawan Malaysia berkata, “Migrasi dalam negeri menyumbang 62.3 peratus daripada jumlah migrasi dalaman pada 2022, sementara 30.3 peratus adalah migrasi antara negeri. Tiga negeri mencatatkan peratusan tertinggi migrasi dalam negeri pada 2022 iaitu Johor (91.9%), diikuti Kedah (72.9%) dan Selangor (71.9%). Sementara itu, Negeri Sembilan dan Perlis merekodkan migrasi dalam negeri terendah pada 2022 dengan masing-masing pada 38.0 peratus.”

Migrasi dalam negeri melalui aliran migrasi menunjukkan bahawa migrasi dari bandar ke bandar kekal tinggi pada 79.3 peratus (2020: 73.0%) diikuti bandar ke luar bandar (14.7%), luar bandar ke bandar (2.4%) dan luar bandar ke luar bandar (3.6%). Berdasarkan penemuan, semua negeri mencatatkan pergerakan dari kawasan bandar ke bandar yang lebih tinggi pada 2022. Namun, Terengganu merupakan satu-satunya negeri yang mencatatkan migrasi dari bandar ke luar bandar yang lebih tinggi pada 41.1 peratus (2020: 10.6%).

Semua negeri merekodkan peningkatan dalam peratusan migrasi antara negeri pada 2022 berbanding 2020 kecuali Johor pada 7.5 peratus (2020: 18.9%), Kedah 27.1 peratus (2020: 43.4%), Selangor 15.0 peratus (2020: 29.4%) dan Sarawak 20.3 peratus (2020: 22.6%).

Selangor mencatatkan pergerakan migran dalaman tertinggi dengan jumlah 29.2 ribu migran masuk. Majoriti migran masuk ke Selangor adalah dari Johor (1.4 ribu orang) dan Kelantan (0.7 ribu orang). Selangor juga merekodkan jumlah migran dalam negeri tertinggi iaitu 26.5 ribu orang, diikuti Johor

(22.4 ribu orang) dan Kedah (7.3 ribu orang). Sementara itu, aliran keluar migran dalaman tertinggi juga direkodkan di Selangor pada 37.2 ribu orang. Majoriti migran keluar berhijrah ke Negeri Sembilan (3.5 ribu orang) dan Kelantan (1.8 ribu orang).

Migrasi antara negeri juga menunjukkan migrasi bersih iaitu perbezaan antara bilangan migran masuk dan migran keluar. Negeri Sembilan merupakan negeri penerima migran tertinggi iaitu meningkat kepada 6.5 ribu orang pada 2022 berbanding 1.5 ribu orang pada 2020. Manakala, Selangor merupakan negeri penghantar migran tertinggi pada tahun 2022 dengan 8.8 ribu orang dan diikuti Johor (6.6 ribu orang).

Ciri-ciri demografi migrasi dalaman menunjukkan bahawa penduduk berumur 25-34 tahun mempunyai kadar migrasi dalaman tertinggi pada 2022 iaitu 0.9 peratus, di mana lelaki 0.8 peratus dan perempuan 0.9 peratus. Sementara itu, penduduk tua (berumur 65 tahun dan lebih) merupakan kumpulan umur yang paling sedikit bermigrasi iaitu 0.1 peratus. Penduduk kumpulan umur 25-34 tahun mendominasi peratusan migrasi dalaman pada 2022 iaitu 33.1 peratus. Ini diikuti dengan kumpulan umur 1-14 tahun (24.2%) dan 15-24 tahun (21.4%). Dari segi jantina, lelaki mendominasi dengan menyumbang 51.3 peratus, manakala 48.7 peratus adalah perempuan.


Dato' Sri Dr. Mohd Uzir Mahidin menambah, "Mengikut keluarga kekal sebagai sebab utama migrasi dalaman pada 2022 iaitu 47.3 peratus (2020: 45.3%). Ini diikuti oleh faktor persekitaran (19.3%), kerjaya (18.3%), perkahwinan dan perceraian (5.7%), pendidikan (5.4%) dan lain-lain (3.9%)."

DOSM sedang menjalankan Banci Ekonomi pada tahun 2023. DOSM amat menghargai kerjasama daripada responden dalam memberikan maklumat kepada DOSM serta menjayakan banci ini. Sila layari www.dosm.gov.my untuk maklumat lanjut.

DOSM telah melancarkan *OpenDOSM NextGen* sebagai medium yang menyediakan katalog data dan visualisasi bagi memudahkan pengguna menganalisis pelbagai data. *OpenDOSM NextGen* ialah platform perkongsian data sumber terbuka dan boleh diakses melalui portal <https://open.dosm.gov.my>.

Dimaklumkan bahawa Kerajaan Malaysia telah mengisytiharkan Hari Statistik Negara (*MyStats Day*) pada 20 Oktober setiap tahun. Tema sambutan *MyStats Day* adalah “*Connecting the World with Data We Can Trust.*”


Carta 1: Siri masa migrasi, Malaysia, 1991 hingga 2022



Nota:

Siri masa bagi tahun 2004 – 2006 terputus kerana pindaan susulan perubahan pada frekuensi Survei Migrasi daripada suku tahunan kepada bulanan.

Carta 2: Peratus migran mengikut negeri destinasi dan taraf migrasi, Malaysia, 2020 dan 2022




Nota:

¹ Tidak termasuk migrasi dari Malaysia ke negara lain

^a Tertakluk kepada ralat piawai relatif yang tinggi dan perlu diguna dengan berhati-hati

Data bagi W.P. Kuala Lumpur, W.P. Labuan dan W.P. Putrajaya tidak dapat dikeluarkan disebabkan nilai relatif yang tinggi

Carta 3: Migrasi dalam negeri mengikut aliran migrasi, Malaysia, 2020 dan 2022



Nota:

^a Tertakluk kepada ralat piawai relatif yang tinggi dan perlu diguna dengan berhati-hati

Data bagi W.P. Kuala Lumpur, W.P. Labuan dan W.P. Putrajaya tidak dapat dikeluarkan disebabkan nilai relatif yang tinggi

Dikeluarkan oleh:

PEJABAT KETUA PERANGKAWAN

JABATAN PERANGKAAN MALAYSIA

17 OGOS 2023